

Presentacion di dos buki di señora Andrea Tchong-Engels



ORANJESTAD (AAN):- Recientemente na Biblioteca Nacional Aruba, Seccion Arubiana, situa na Bachstraat, presentacion di un buki nobo pa nos muchanan di e autora Señora Andrea Tchong-Engels, cu ta hiba e titulo di Bubu y Bibi Burico. Señora Andrea Tchong-Engels no ta un desconoci den e mundo di skirbi buki, ya cu esaki ta su di 2 titulo. Primeramente Señora Tchong-Engels a yega di debuta cu su buki Pepe Pelican, ta trata e bida di e pelican nan na Aruba.



Señora Andrea Tchong-Engels a nace na Mierlo, Noord Brabant na año 1943. Andrea a crece na Maas en Waal. Despues di a gradua pa diferente acto den enseñansa, entre otro den handelskennis, huishoudkunde, handenarbeid y SPD, a dedica mas o menos 20 año den enseñanza basico y avansa na tanto MULO y MAVO.

Awor aki Andrea a haci Aruba su cas, na unda e ta biba y traha. Pa un tempo cabá e tin un negoshi propio "Raamboutique" cu ta

encarga cu decoracion nan di bentana cu diferente tipo di cortina como proteccion contra solo. Andrea ta duna les di conficcion y ta duna tambe bijles na e muchanan cu tine dificil.

Aunke Andrea ta un persona hopi ocupa, el a skirbi su prome buki algun año atras Pepe Pelican, cu trata e bida di e pelicanan na Aruba. Den e buki aki a introduci Janchi, e personahe principal den e bukinan di Andrea. Den e storia Janchi ta topa Pepe, e pelican y Janchi ta haya un boter di lechi regalo for di Pepe pa e bebe pa asina aki e por compaña Pepe pa bay conoce su famia mas cerca. Na año 2001 Andrea a participa como autor den e festival di buki debutando cu su buki Pepe Pelican.

E publico a bini hunto pa admira e di dos buki di Andrea Tchong-Engels cu ta hiba e titulo "Bubu y Bibi Burico, cual ta dedica un acento hopi special riba nos buriconan den e naturaleza di Aruba. E buki Bubu y Bibi Burico a worde ilustra pa Lara Kuiperi, un artista hoben cu ta sali pa prome biaha como ilustradora di buki. Ban hunto cu Janchi den e buki di Bubu y Bibi Burico pa conoce nos buriconan.

E anochi a worde complementa cu un fragmento di e storia conta pa Astrid Gietel acompaña pa un "Power Point Presentation". Tambe tabatin e presentacion di e hoben Andrea Nieuwboer cu e grupo Pierewietje dedicando un cancion special na nos buriconan. Pa sera e presentacion Señora Desiree Elderling di Fundacion Salba Nos Burico, a duna un charla tocante e buriconan na Aruba. Despues esnan presente a disfruta pasa bocanan dushi y tambe por a cumpra e buki pa nan coleccion.